

## 龍津石橋碑

新安地瀕遐海，九龍山翠，屏峙南隅。環山居者，數十萬家。自香港埠開，肩相摩、踵相接。估船番舶，甲省東南。九龍趁集日夥；蜃人操舟，漁利橫流，而渡無虛期。地沮洳阻深，每落潮，篙師無所逞。同治歲癸酉，眾釀金易渡而梁。計長六十丈，廣六尺，為礫二十有一。糜金錢若干。光緒乙亥橋竣。夫除道成梁，古王遺軌。然工程全集，往往道潰於成。謀夫孔多，職此之咎。今都人士，一乃心力，以告厥成功。使舊時澱滓之區，成今日津梁之便。垂之綿遠，與世無窮。此豈關地之靈歟？抑亦由人傑也。銘曰：

叱鼉橫漢，駕鵠凌霄。在天成象，在地成橋。擲杖虹飛，受書溪曲。仰桂攀丹，垂楊撲綠。斬蛟何處，騎虎誰人。高車駟馬，於彼前津。石昏神鞭，杵驚仙搗，乘鯉江皋，釣鯨煙島。帽簷插杏，詩思吟梅。風人眺覽，雪客裴裴。繫彼雌霓，臨江炫彩。矧此滄溟，樓船出海。乃邀郢匠，乃命倕工。紐牽怪石，斤運成風。投馬完隄，斷鼉支柱。未雲何龍，屹立江滸。鹵潮碧暈，鹹汐珠圓。漁燈掩月，蟹火沉煙。黃竹肩箱，綠荷包飯。彼往經營，此來負販。蘭橈翦浪，桂棹凌波。震天水調，月夜漁歌。陵谷雖遷，滄桑不改。鞏於金湯，萬年斯在。

欽加道銜安徽廬州府知府，署鳳穎六泗兵備道，前掌京畿道、江南道、湖廣道監察御史、山西提督學政冼斌

補行己未壬戌恩科舉人南海何又雄書

倡建首事

廣東大鵬協鎮都督府彭

廣東大鵬協鎮中軍都壘府劉

署新安縣九龍分司巡政廳周

光緒元年(1875)歲次乙亥孟冬吉日立